

11-April-2026

आकाशवाणी

खबरां विजय बजाज कोला,

खास-खास खबरां:-

1. समूलचा राष्ट्र अज्ज महान समाज सुधारक महात्मा ज्योतिबा फुले होरें गी उं'दी जयंति पर श्रद्धांजलि अर्पित करा'रदा ऐ।
2. तेलंगाना च 42 नक्सलियें दे समर्पण दे बाद राज्य गी नक्सलवाद थमां मुक्त घोषित करी दिता गेआ ऐ।
3. पच्छिम एशिया च केंई हफ्तें थमां जारी संघर्ष गी खत्म करने दे मकसद कन्नै अमरीका ते ईरान बश्कार अज्ज इस्लामाबाद च सिद्दी गल्लबात होग।
4. नासा दे आर्टेमिस 2 चन्द्र मिशन दे चौनै अंतरिक्ष यात्री अज्ज सुरक्षित धरतै पर परतोई आए न।
5. भारती अंतरिक्ष अनुसंधान संगठन इसरो नै गगनयान मिशन लेई दूआ एकीकृत वायु विस्फोट परीक्षण कामयाबी कन्नै पूरा करी लैता ऐ।
6. एशियाई विकास बैंक नै चालू माली बरे लेई भारत दे विकास सरबंधी अनुमान गी साइडे 6 फीसद कोला बदाइयै 6 इशारिया 9 फीसद करी दिता ऐ।
7. ते IPL च कल रातीं गोहाटी च खेड्डे गेदे मुकाबले च राजस्थान रॉयल्स नै रॉयल चैलेंजर्स बेंगलुरु गी हराई दिता ऐ।

<><><><><><>

Jyotiba Phule -Anniversary

समाज सुधारक ते महान जनसेवक महात्मा ज्योतिबा फुले हुंदी जयंति पर अज्ज देश उन्नै'गी श्रद्धांजलि अर्पित करा'रदा ऐ। 1827 च अज्जै दे दिन गै जन्मे ज्योतिबा फुले होरें अपनी धर्मपत्नी सावित्री फुले हुंदें कन्नै रलियै महिला शिक्षा ते सशक्तिकरण लेई महत्वपूर्ण कम्म कीते। एहदे कन्नै गै उ'नें जाति बवस्था ते छूआ-छूत जनेही समाजिक बुराइयें गी खत्म करने लेई संघर्ष कीता। राष्ट्रपति द्रौपदी मुर्मू- उपराष्ट्रपति सी.पी. राधाकृष्णन- प्रधानमंत्री नरेन्द्र मोदी- लोकसभा अध्यक्ष ओम बिरला ते होरनें प्रमुख सांसद ते मन्ने-परमन्ने दे लोक- संसद भवन परिसर च प्रेरणा स्थल पर ज्योतिबा फुले होरें गी पुष्पांजलि अर्पित करडन। इस मौके देसै दे बक्ख-बक्ख हिस्से च केंई कार्यक्रम आयोजित कीते जाने न।

<><><><><><>

Telangana -Surrender

तेलंगाना च 42 नक्सलियें दे समर्पण दे बाद राज्य गी नक्सल-मुक्त घोषित करी दिता गेआ ऐ। तेलंगाना पुलसा दे ड्रैक्टर जनरल बी. शिवधर रेड्डी होरें आखेआ ऐ जे नक्सली -कमांडर सोडी मल्ला सने 42 नक्सलियें दे समर्पण दे बाद तेलंगाना नक्सलवाद शा मुक्त होई गेआ ऐ। रेड्डी होरें आखेआ जे तेलंगाना राज्य समीति पूरी चाल्ली भंग करी दिती गेई ऐ। उ'नें दस्सेआ जे 42 नक्सलियें- 5 ए.के.- 47 रफ्लें- 4 SLR रफ्लें- 2 देसी हथगोलें- इक जहार शा मते कारतूसें ते 800 ग्राम सुन्ने दे कन्नै आत्म-समर्पण कीता ऐ। रेड्डी होरें इब्बी दस्सेआ जे पुलस बक्ख-बक्ख इलाकें च नक्सलियें आसेआ लाए गेदे IED दा पता लाइयै उनें'गी हटाने आस्तै समर्पण करने आलें नक्सलियें दी मदाद लै'रदी ऐ। समर्पण करने आलें नक्सलियें गी सरकार दी तरफा माली मदाद दिती जा'रदी ऐ- ओह अपने दोस्तें- रिश्तेदारें कन्नै मिली सकदे न ते मीडिया कन्नै बी गल्लबात करी सकदे न।

<><><><><><>

US-Iran Talks

पच्छिम एशिया च जारी संघर्ष गी खत्म करने लेई अमरीका ते ईरान मझाटै अज्ज इस्लामाबाद च वार्ता होग। अमरीकी प्रतिनिधिमंडल दी अगुआई उपराष्ट्रपति J.D. Vance होर करडन। उन्दे कन्नै राष्ट्रपति डोनाल्ड ट्रम्प हुंदे विशेष दूत Steve Witkoff ते सलाहकार Jared Kushner बी मौजूद होडन। ईरान दा प्रतिनिधिमंडल संसद दे अध्यक्ष मोहम्मद Bagher Ghalibaf करडन। गल्लबात च ईरान दे परमाणु कार्यक्रम- बैलिस्टिक मिसाइल ते होर्मुज जल डमरु मध्य पर वशेष तौरा पर चर्चा होने दी मेद कीती जा'रदी ऐ। एह गल्लबात राष्ट्रपति ट्रम्प दी 2 हफते दे युद्धविराम दी घोषणा दे मगरा होआ करदी ऐ।

<><><><><><>

LG,CM- Condolence

उपराज्यपाल मनोज सिन्हा ते मुखमंत्री उमर अब्दुल्ला होरें शुक्रवारें कुबैत च होए दे इक दर्दनाक सिडक हादसे च राजौरी ते पुंछ जिलें दे बसनीकें दी मौत पर दुख ते बसोस प्रगट कीता ऐ। इस हादसे च राजौरी दे थन्नामंडी ते पुंछ जिले दे सुरनकोट थमां किश बसनीकें दी मौत होई ऐ। उपराज्यपाल होरें आखेआ जे इस हादसे च जान मुहाने आले लोकें दे परोआर आलें कन्नै उन्दी दिली संवेदनां न। तौंआई मुखमंत्री होरें बी थन्नामंडी ते सुरनकोट दे लोकें दी कुबैत च होए दे सिडक हादसे च मौत पर इंगा दुख जाहिर कीता ऐ।

<><><><><><>

Artemis -II

नासा दे आर्टेमिस-2 चन्द्र मिशन दे चौने अंतरिक्ष जातरी अज्ज धरतै पर परतोई आए न। उंदा ओरियन अंतरिक्ष यान- जिसी इंटीग्रेटी नांs दिता गेआ हा- आटोमेटिक नियंत्रण प्रणाली दे तैहत प्रशांत महासागर च उतरेआ। चंऊ मैम्बरें आले इस दल दी वापसी ऐतिहासिक ते गौरवपूर्ण रेही ऐ। रिकार्ड बनाने आले इस चन्द्र Flyby मिशन दे दरान अंतरिक्ष जातरिएं चन्द्रमां दे ओकड़े हिस्सें बी दिक्खे जिनें'गी मनुक्खी अक्खें पैहले कदे नैई दिक्खेआ हा। कमांडर रीड Wiseman-पायलट विक्टर ग्लोवर- क्रिस्टीना कोच ते कनाडा दे जेरेमी हैनसेन हुंदे कन्नै अंतरिक्षयान ने आवाज़ दी गति कोला 33 गुणा तेज़ यानि मैक-33 दी रफ्तार कन्नै धरतै दे वायुमंडल च प्रवेश कीता। ऐसा ढक्ख-नासा दे 1960 ते 1970 दे दहाकें दे अपोलो चन्द्र अभियानें दे बाद पैहली बारी दिक्खने गी मिलेआ। 10एं दिनें दे इस मिशन दे दरान एह दल 50एं बरे शा मते समें परैन्त चन्द्रमां बक्खी जाने आला पैहला मनुक्खी दल बनेआ। इसने धरतै थमां हुनै तगर दी सब्बनै शा मती दूरी तय करने दा नमां रिकार्ड बी बनाया ऐ।

<><><><><><>

ISRO -Gaganyan

भारती अंतरिक्ष अनुसंधान संगठन इसरो नै आंध्र-प्रदेश दे श्रीहरिकोटा च गगनयान मिशन लेई दुआ सफल एकीकृत वायु विस्फोट परीक्षण कीता ऐ। एह प्रणाली मनुक्ख सने अंतरिक्ष डुआरी दे दरान अंतरिक्ष जातरिएं दे कैप्सूल- कू मॉड्यूल दी सुरक्षित वापसी जकीनी बनाने लेई जरूरी ऐ। मॉड्यूल दे छोड़े जाने दे बाद 10 पैराशूट आली प्रणाली दा इस्तेमाल कीता गेआ- जेहदे नै कैप्सूल दी रफ्तार गी सुरक्षित पानी दे स्तर धोड़ी हौला करने च मदाद मिली। पैहला कामयाब परीक्षण 24 अगस्त 2025 गी श्री हरिकोटा दे सतीश धवन अंतरिक्ष केन्द्र च होआ हा। एहदे च चिन्कू हैलीकाप्टर थमां 4 इशारिया 8 टन दे Dummy Crew Module गी 3 किलोमीटर दी ऊंचाई परा हेठ सुट्टेआ गेआ हा। वायु विस्फोट परीक्षण अंतरिक्ष यान दी धरतै पर वापसी दे अखीरी चरण लेई महत्वपूर्ण ऐ। परीक्षण दे दरान जहाज जां हैलीकाप्टर- अंतरिक्षयान गी इक तय ऊंचाई परा हेठ छोड़दा ऐ। केन्द्री मंत्री डाक्टर जितेन्द्र सिंह होरें इस कामयाब परीक्षण लेई इसरो गी मुबारकबाद दिती ऐ।

<><><><><><>

ADB Ind. Growth

एशियाई विकास बैंक -ADB नै चालू माली बरे 2026-27 लेई भारत दे विकास दे अंदाजे गी साड्डे 6 फीसद शा बधाइयै 6 इशारिया 9 फीसद करी दिता ऐ। ADB दे एशियाई विकास आउत्लुक दे मताबक मज़बूत घरेलू मंग- रपेआ पैसा उपलब्ध करोआने दी सौक्खी स्थितिएं ते भारती चीजें पर अमरीकी टैरिफ च कमी दी वजह करी चालू माली बरे च भारत च विकास मज़बूत रौहने दी मेद ऐ। रिपोर्टें च इस गल्लै दा जिक्र कीता गेआ ऐ

जे एशिया ते प्रशांत खेतर दी मती सारी अर्थबवस्थाएं च इस बरे ते अगले बरे बी कमी आंग। पच्छिम एशिया च संघर्ष ते बपार च लगातार बनी दी यक्को-तक्की दे कारण इस खेतर च आर्थिक विकास दी दर पिच्छले बरे दे 5 इशारिया 5 फीसद कोला घटियै एदे अगले बरे च 5 इशारिया इक फीसद रौहने दी मेद ऐ।

<><><><><>

Foreign Exchg Reserve

भारत दा बदेशी मुद्रा भंडार 3 अप्रैल गी खत्म होए दे हफ्ते च 9 अरब डालरें शा मता बधियै 6 खरब 97 अरब 12 करोड़ 10 लक्ख डॉलर होई गोआ ऐ। भारती रिज़र्व बैंक मूजब- देशै दे बदेशी मुद्रा भंडार च अप्रैल दे पैहले हफ्ते च मज़बूत बाददा होआ ऐ। एह बाददा पिच्छले हफ्तें च 10 अरब डॉलरें शां मते दी गिरावट दे मगरा होआ ऐ। पिच्छले हफ्ते बदेशी मुद्रा भंडार 6 खरब 88 अरब डॉलर शा मता हा।

<><><><><>

IPL

IPL क्रिकेट च जंदी रातीं राजस्थान रॉयल्स नै लगातार चौथी जित दर्ज करदे होई रॉयल चैलेन्जर्स बेंगलूरु गी 6 विकेटें कन्नै हराई दिता। 202 रन्जे दे लक्ष्य दा पिच्छा करदे होई राजस्थान नै 18 ओवरें च गै जित हासल करी लैती। वैभव सूर्यवंशी गी प्लेयर ऑफ द मैच चुनेआ गोआ। तोंआई अज्ज पंजाब किंग्स दा मकाबला सनराईज़िज हैदराबाद कन्नै दपैहरी साइडे 3 बजे थमां होग ते संजालै साइडे 7 बजे चेन्नेई सुपर किंग्स ते दिल्ली कैपिटल्स बश्कार मैच खेडेया जाहग।

<><><><><>

Asia Wrestling Championship

भारत दी मीनाक्षी गोयल नै कल किर्गिस्तान दे बिश्केक च आयोजित कुश्ती चैम्पियनशिप दे महिला 53 किलोग्राम वर्ग च चांदी दा तगमा जितेआ। इय्यां गै मोनिका नै 65 किलो ते हर्शिता नै 72 किलोग्राम वर्ग च अपने-अपने कैह दे तगमें जितियै पोडियम पर थाहर बनाई। सुन्ने दे तगमे आले मुकाबले च सुजीत कलकल दा साममना उज्जबेकिस्तान दे उमिदजोन जलोलोव कन्नै होग। अभिमन्यु मडवाल नै सैमीफाईनल च किर्गिस्तान दे मौजूदा चैम्पियन एर्नाज़र अकमातालियेव गी 6-3 कन्नै हराईयै 70 किलोग्राम वर्ग दे फाईनल च थाहर पक्की कीती। सुन्ने दे तगमे लेई उन्दा मुकाबला मंगोलिया दे तोमोर ओचिरिन तुलगा कन्नै होग।

<><><><><>